

**CANONUL
SF. ÎNGER
PĂZITOR
AL
VIEȚII OMULUI**

CANONIER-RU



Канон

Ангелу Хранителю

Песнь 1

(глас 4)

Ирмос: Моря чермную пучину невлажными стопами древний пешествовав Израиль, крестообразными Моисеевыми руками Амаликову силу в пустыни победил есть.

Припев: Святой Ангеле Божий, хранителю мой, моли Бога о мне.

Ангела воспою, светлаго Хранителя моей души, твердаго заступника и окормителя, светозарнаго предстоятеля у Престола Божия за окаянство мое.

Наставниче мой Ангеле, буди всегда предстоятель за мя пред Господом, разоряя стену безбожия, окрест мене создаемую.

Глаголы живота вечнующаго по вся дни поучают мя, яже ко благочестию буди наставником в заповедях Господних хранителю мой, святой Ангеле.

Песнь 3

Ирмос: Веселится о Тебе Церковь Твоя, Христе, зовущи: Ты моя крепость, Господи, и прибежище, и утверждение.

Ежечасно ко благочестию стопы моя
направи, Ты бо еси мое упование и покров,
и ограждение.

Лицы святых присно молятся Богу, ты же,
святый Ангеле, не престай молитися за мя.
Уста моя и ум мой во злочестии оскверних,
ныне, отрезвясь, ко Ангелу вопию: не
отступая храни ум мой во благе.

Песнь 4

Ирмос: Вознесена Тя видевши Церковь на
Кресте, Солнце праведное, ста в чине
своём, достойно взывающи: Слава силе
Твоей, Господи.

Приступая, скверный, ко Владыке, кий
ответ воздам? Токмо Ангела заступника
молю: помози ми на Суде Вседержителя.
Осквернихся страстно, окаянный, паче
скотски согрешив, к тебе, заступнику,
вопию велегласно: умоли о мне всех
Содетеля.

Херувимов и Серафимов со всевоинством
младший сослужителю, предстоя выну пред
Милосердным Господем, о моем моли
недостойнстве.

Песнь 5

Ирмос: Ты, Господи мой, Свет в мир пришел еси, Свет Святый, обращаешь из мрачна неведения верою воспевающыя Тя. Велия греси пред Господем сотворяя выну, не возмогаю оправдаться благими делами. Ангеле, ты мя направи ко благу.

Ангела заступника непрестанно молю о предстательстве за мя, злочестиваго, пред Господем, да помилован буду в Господне пришествие.

Лицы Ангелов трисвятая деннонощно воспевают велегласно. Ты, Ангеле, за мя мольбу вознеси, да изменю свое злоустремление.

Песнь 6

Ирмос: Пожру Ти со гласом хваления Господи, Церковь вопиет Ти, от бесовския крове очищися ради милости от ребр Твоих истекшею Кровию.

Жертву мою Господу вознеси, пресвятый Ангеле, очисти мя Божественною благодатию, ты бо еси ходатай и заступник за мя даже до смерти.

Величество Божия человеколюбия и благодать неистленную от Господа мне преподай, Ангеле Божий, мой дивный

хранителю.

Осквернихся безбожными хотеньми и срамным сквернодейством, Ангела заступника тя молю: настави мя к Богу всегда устремлятися.

Песнь 7

Ирмос: В печи авраамстии отроцы персидстей, любовью благочестия паче, нежели пламенем, опаляеми, взываху: благословен еси в храме славы Твоея, Господи.

Сосуд Божия благодати себе самого аз осквернив, не имея спасения надежды молю тя, Ангеле, спасение преподай ми от Бога Всемилосердого.

Плачу и рыдаю, смерть предо мною предстоит, ты, Ангеле, прежде моя кончины к добродетели душу мою настави, да не буду изринут вон.

Елей изливая на мя Божия милосердия, не престай о мне молитися, да в веке будущем не лишуся с Богом пребывания.

Песнь 8

Ирмос: Руце распростер, Даниил львов зияние в рове затче, огненную же силу угасиша, добродетелию препоясавшееся,

благочестия рачители отроцы, взы-вающе:
благословите, вся дела Господня, Господа.
Велию милость ми преподай, от
Всемиловитоваго мнозе изливаемую, верныя
люди приобщающую Божеству
несказанному, яже во приснопробывание в
Царстве Божиим во славе Господней.
Ангела пою всесветлаго, благочестия
вернаго наставника, Хранителя моего и
покровителя от треволнений житейских и
от всяких скорбных обстояний,
путеводителя вернаго в горния обители.
Юдоль плача и обитель скорби суть моя
земная, никогдаже отходящая чертози,
поне в грядущем вечнем животе радости
сподоби нестареющейся Ангеле мой,
всеусердный заступниче.

Песнь 9

Ирмос: Камень нерукосечный от несекомыя
горы Тебе, Дево, краеугольный отсечеса,
Христос, совокупивый разстоящаяся
естества. Тем веселящеса Тя, Богородице,
величаем.

Правды Солнца, единого света Христа
праведнаго служителя соделай мя, святыи
Ангеле, приобщая Церкви Божией своим
твердым за мя молением.

Руце простираю к тебе, мой бесплотный
благопоспешный предстоятелю, не отступи
от моего окаянства, обаче сподоби от
погибели вечной спастися.

Истины Божией и славы Господней
сподоби, Ангеле, Божественно таинственно
приобщиться, да не буду отринут в
погибель за беззаконие.

Света невещественнаго, Самаго Господа
Христа в сердце мое введи, тамо всегда
пребывания Его обитель сотвори, святой
Ангеле.

Слава.

Троичен.

Нас, недостойных, моления Трисвятой
Господи прими, никогдаже отвергаеши
сердца горящие любовью, яже ко Твоему
Трисвятому Величеству.

И ныне.

Богородичен.

Оставление беззаконных согрешений
подаеши молящим Тя, Препоблагая
Богородице, и помогаеши изнемогающим
от страстей, сего ради Тебе вси концы
земли, яко Премилосердную величают.